

Skýrsla starfsmanna SAM árið 2009

Almenn starfsemi SAM var svipuð árið 2009 og verið hafði árið 2008. SAM sinnti á árinu ýmsum sameiginlegum hagsmunamálum afurðastöðva mjólkuriðnaðarins, þar með talið samskiptum við innlenda hagsmunaaðila og við alþjóðleg hagsmunasamtök í mjólkuriðnaði. Aðrir starfsþættir SAM í árslok 2009 voru: Rekstur rannsóknastofa sem sinna efna- og gerlamælingum í mjólk; rekstur Framleiðendapjónustu (mjólkureftirlit); rekstur Lögbundinnar verðtilfærslu og Verðmiðlunar samkvæmt samningi við Bændasamtök Íslands og rekstur Verðtilfærslusjóðs SAM.

BÓKHALDS- OG FJÁRMÁL

Starfsmenn félagsins annast alla bókhalds- og fjármunaumsýslu samtakanna, auk þess að annast bókhald og fjármál fyrir Markaðsnefnd mjólkuriðnaðarins, Verðmiðlunarsjóð mjólkur og lögbundinn Verðtilfærslusjóð mjólkur. Ársreikningar Samtaka afurðastöðva í mjólkuriðnaði og Markaðsnefndar mjólkuriðnaðarins eru birtir í ársskýrslu SAM, en ársreikningum Verðmiðlunarsjóðs og Lögbundins Verðtilfærslusjóðs er skilað til Fjársýslu Ríkisins. Frá árslokum 2008 hefur SAM einnig annast útreikning launa fyrir Mjólkursamsöluna ehf auk annarra verkefna vegna starfsmannahalds Mjólkursamsölnnar.

SKÝRSLUHALD VEGNA MÓTTEKINNAR MJÓLKUR OG RÁÐSTÖFUNAR HENNAR

Samkvæmt samningi við Bændasamtök Íslands annast SAM mánaðarleg skil á Framleiðslu-, sölu- og birgðaskýrslum fyrir aðildarfélög SAM. Þær upplýsingar sem safnast til félagsins með vinnslu skýrslanna mynda grunn að tölfræði sem SAM safnar og vinnur fyrir aðildarfélögin og til opinberrar birtingar. SAM veitir tölfræðiupplýsingar um mjólkuriðnaðinn meðal annars til Hagstofu Íslands, tölfræðistofnunar Evrópu (Eurostat) og alþjóða mjólkuriðnaðarsamtakanna IDF (International Dairy Federation). Þá eru skýrslurnar grunnur fyrir útreikningi á gjaldi til Verðmiðlunarsjóðs og á mánaðarlegum verðtilfærslum sem reiknaðar eru samkvæmt lögum og heimildarákvæði laga. Ítarlega er fjallað um móttöku mjólkur og ráðstöfun hennar síðar í árs-skýrslunni.

ERLEND SAMSKIPTI

Aðalfundur alþjóðlegu mjólkuriðnaðarsamtakanna - IDF - fór fram í síðari hluta september 2009 í Berlín. Fimm fulltrúar íslenskrar mjólkurframleiðslu og mjólkuriðnaðar sóttu fundinn.

Í kjölfar aðalfundar IDF er ávallt haldin ráðstefna þar sem farið er ítarlega yfir þróun framleiðslu, vinnslu og sölu mjólkur og mjólkurafurða í heiminum. Á ráðstefnunni var að þessu sinni lögð höfuðáhersla á umhverfismál og áhrif mjólkurframleiðslu og mjólkurvinnslu á umhverfið.

Glærur frá öllum fyrirlesturum ráðstefnu IDF er aðgengilegt fyrir gesti ráðstefnunnar að henni lokinni. Allar glærurnar voru fluttar á tölvunet Mjólkursamsölnnar ehf og þannig gerðar aðgengilegar starfsmönnum fyrirtækisins. Einnig var efni nokkurra fyrirlestra kynnt sérstaklega fyrir starfsmönnum MS. Næsti aðalfundur samtakanna verður haldinn á Nýja Sjálandi í byrjun nóvember 2010.

Upplýsingum frá IDF var komið á framfæri til fjölda aðila árið 2009, meðal þeirra má nefna: Yfirdýralækni, Sérgreinadýralækni nautgripa- og sauðfjársjúkdóma og aðilum innan Bændasamtaka Íslands og Landbúnaðarháskóla Íslands á Hvanneyri.

SAM hefur verið aðili að norrænu samstarfi um mjólkureftirlit og mjólkurgæði (NMSM) frá árinu 1996. Þátttakendur í samstarfinu eru Noregur, Danmörk, Svíþjóð, Finnland og Ísland. Markmið samtakanna er að vinna að bættum gæðum hrámjólkur með sérstakri áherslu á dýraheilsu, fóðrun og mjólkurgæði, véla- og mjaltatækni. Starfið er byggt upp á vinnu starfshópa fyrir þrjú sérsvið. Fulltrúar Íslands í starfinu eru Jón K. Baldursson í gæðahópnum, Þorsteinn Ólafsson í dýraheilsuhópnum og Snorri Sigurðsson í tæknihópnum. Aðalfundur samtakanna árið 2009 var haldinn í Lundi í Svíþjóð.

Einnig var haldinn fundur í Nordisk Bransjemöte, en fundurinn fór að þessu sinni fram í Noregi. Fulltrúi Íslands á fundinum var Pálmi Vilhjálmsson. Á fundinum var ákveðið að þetta yrði síðasti fundurinn í Nordisk Bransjemöte.

RANNSÓKNARSTOFA SAM

Starfsemi Rannsóknarstofu SAM var með svipuðu sniði og fyrri ár. Nánar er greint frá starfi og niðurstöðum rannsóknarstofunnar síðar í ársskýrslu SAM.

Bjarni Ragnar Brynjólfsson